

JUICIO MILITAR PA PROME BIAHA NA ARUBA AWE

ORANJESTAD(AAN)—Awe lo ser teni pa prome biaha na Aruba un juicio militar, y esaki lo ta den Marinierskazerne na Savaneta.

Pa e juicio militar publico aki, a transforma e capilla di kazerne na Savaneta den un corte di justicia.

E caso cu ta ser trata lo ser presidi pa Mr. Saleh, presidente di corte di justicia di Antillas, y fiscal lo ta Mr. Vos di Curacao. Defensor di e acusado antillano, ta reverendo Ds. Spaans.

Segun DIARIO tin entendi e caso aki ta trata violacion di leyman di

narcotica y diavierna ultimo a trata e caso caba na Curacao, te cu fiscal a exigi un multa y castigo condicional pa e acusado militar antillano.

Pero e caso no a yega na un fin como cu tin testigo na Aruba pa ser interoga di manera cu continuacion di e caso lo ta na Aruba.

Masha poco juicio militar ta tuma lugar na Antillas y tur te awor tabata na Curacao. E caso cu ta ser trata mañan lo ta e prome na Aruba y pa prome biaha tambe den un capilla di kazerne.

Segun PDA

ENTREGA DI EMPLEADONAN PUBLICO LO ALCANZA 30 PA 40 PORCIENTO

ORANJESTAD(AAN)—Partido Democratico Arubano no ta contento cu e anuncio di cu lo bay kita 10 por ciento mas di salario di trahadonan publico.

PDA ta mustra cu relaciona cu e situacion dificil di Antillas, Gobierno

Central tambe mester bay tuma su medidanan.

Pero Gobierno Central a dicidi tambe cu nan si ta honra e acuerdo cu sindicatonan pa paga e placa di vacacion ariba e prome cinco lunanan di 1985.

En cambio na Aruba, gobierno no kier respeta

e acuerdo cu e sindicatonan y ta pretende cu no tin placa pa esey.

PDA ta puntra ta di con ta e pueblo trahador mester sigui entrega, mientras e conhungto di diputadonan, Consehero General y demas ta sigui come, bebe, viaja manera nada a pasa?

"Despues di a entre caba 7 3/4 por ciento y na fin di juni otro 10 por ciento mas, nan kier kita e placa di vacacion tambe locual segun calculonan di PDA ta mas o menos 2.5 millon florin.

"PDA a calcula cu pa fin di e aña aki e entrega di parti di empleado publico lo alcanza en total 30 pa 40 por ciento, cual ta igual na mas o menos 30 millon florin. 30 Millon florin cu e partido cu ta forma gobierno actual a priva e trahadonan pa paga su debenan y te ainda no tin un vista cu esey lo ta suficiente, pasobra e maneho ta asina caotico cu nan mes no sa cuanto nan debe", segun PDA.

E partido ta sigui bisa

cu fuera di e entrega grandi di salario, tin un paquete tambe di medida ainda, pero envista cu eleccion ta acercando,

gobierno no ta bay kita e 500 empleadonan for di trabao pa no stroba nan di vota ariba e partido na mando.

LIDERNAN DI FRACCION TA SIGUI REUNI AWE ENCUANTO GOBERNADOR PA ARUBA

ORANJESTAD(AAN)—Diamars lidernan di fraccion di e partidonan politico a reuni ariba nombramento di candidato pa puesto di gobernador pa Aruba.

A keda dicidi pa continua cu e reunion awe pa asina por yega unanime na e candidato cu lo ser proponi pa e puesto di gobernador.

Segun DIARIO tin entendi varios bon candidato a ser menciona durante e reunion. A prefera di no menciona number di e candidatonan pa publicacion. Ta ser spera cu lo por yega na un decision awe y cu diavierna be-

stuurscollege por tuma e decision.

MIEMBRONAN NOBO NOMBRA PA COMISION DI APELACION

ORANJESTAD(AAN)—Algun siman pasa DIARIO a publica di e falta di 4 miembro pa comision di apelacion di Cuido Social.

E presidente a pidi su retiro y 3 miembro su periodo a caduca.

Parlamento di Aruba unanime a nombra e miembronan nobo cu ta

Siquillesa pag 12

MAESTRONAN CASA TA SER RETIRA DI TRABAO

ORANJESTAD(AAN)—E comentario mas grandi cu a circula ayera y cu a haya un reaccion fuerte di desgusto ta relaciona cu carta cu Bestuurscollege a manda pa tur school, cu ta carta di retiro pa maestranan cu ta casa y den algun caso hasta pa maestra nan cu ta divorcia.

Masha indigna hopi hende a keda cu e notificacion aki, y cu e maestranan lo ser retira entrante prome di augustus di e aña aki.

Di parti di gobierno no a sali ningun informacion encunto esaki y tabata wordo comenta cu no ta tur maestra lo bay cas tampoco, pasobra lo percursa pa otro empleo pa algun di nan. Por a tende cu e asunto aki a ser trata misteriosamente y cu e decision a ser tuma sin cu tabata tin planificacion y sin cu a elabora cu e sindicato di maestronan tampoco ariba e asunto aki.

E sindicato mes ayera a emiti un comunicado expresando nan protesta fuertemente contra e retironan cu lo cay proximamente.

TURISMO TA SIGUI DEN BON CAMINDA

ORANJESTAD(AAN)—Durante luna di april e aña aki a bishita Aruba un total di 18960 turista, locual ta 340 turista mas cu aña pasa den e mes luna. Segun cifranan di estadistanan compila pa Oficina di Turismo, e mercado di Estados Unidos a registra un aumento di 161 turista compara cu april aña pasa. E total di turistanan americano aña pasa tabata 13394 den luna di april y e aña aki 14555.

Mercado di Venezuela y tambe di Colombia a cay den luna di april e aña aki compara cu aña pasa. Cantidad di turista di Venezuela a cay un poco for di 2038 aña pasa pa 1897 e aña aki y di Colombia a cay di 1009 pa 795.

Mayoria di turistanan americano cu ta bishita Aruba ta bini di estado New York.

E resumen mensual di turismo ta mustra cu di januari e aña aki pa luna di april un total di 74890 turista a bishita Aruba y for di e cantidad aki 58066 ta di Estados Unidos, 5459 di Venezuela y 3116 di Colombia. Teniendo cuenta cu turismo ta e fuente di entrada mas grandi actualmente na Aruba, tur ciudadano ta ser recorda pa mantene e hospitalidad, servicio y limpieza na halto. Cu nos aporte e industria di turismo ta sigui crece contribuyendo na estabilidad di e economia di Aruba.